

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 484537 25 St
Tuzla, 11.02.2026. godine

OPĆINSKI SUD U TUZLI, sudija Vedran Milašinović razmatrajući prijedlog predlagača stečajnog dužnika „HAX TRANS“ d.o.o. Tuzla, Pasci Donji br. 223, van ročišta donio je dana 11.02.2026. godine sljedeće:

R J E Š E N J E

JAVNO SE POZIVAJU predlagač, povjerioci i sva zainteresovana lica da u roku od 30 (trideset) dana od dana objavljivanja rješenja u Službenim novinama F BiH predlože otvaranje stečajnog postupka i na žiro-račun Suda, broj: 132-100-03091233-91 NLB banka dd Sarajevo, predujme iznos od 3.500,00 KM (trihiljadepetstotinakonvertibilnihmaraka), na ime obezbjeđenja troškova stečajnog postupka, te da dokaz o izvršenoj uplati dostave sudu pozivom na broj predmeta.

Ukoliko stečajni dužnik kao predlagač ili neko od zainteresovanih lica ne uplati navedeni iznos predujma u ostavljenom roku uz dostavu dokaza o uplati sudu pozivom na broj predmeta, sud će o prijedlogu za otvaranje stečajnog postupka odlučiti u skladu sa odredbama Zakona o stečaju.

Rješenje će biti objavljeno u Službenim novinama F BiH, web stranci suda i oglasnoj ploči suda.

O b r a z l o ž e n j e

Sud je dana 01.07.2025. godine pokrenuo prethodni postupak radi utvrđivanja uslova za otvaranje stečajnog postupka nad imovinom privrednog društva „HAX TRANS“ d.o.o. Tuzla, Pasci Donji br. 223, a za privremenog stečajnog upravnika imenovan je Edin Bašić iz Živinica. Dana 28.08.2025. godine i dopuna izvještaja 07.10.2025. godine privremeni stečajni upravnik je dostavio izvještaj o provedenom prethodnom postupku.

Iz izvještaja privremenog stečajnog upravnika i navoda datih na ročištu proizilazi da je društvo prestalo sa obavljanjem djelatnosti 2022. godine. Glavni račun društva je blokiran dana 10.05.2022. godine, a posljednji račun je blokiran 01.12.2022. godine. Bankovni računi dužnika su blokirani u korist povjerilaca i to PU F BiH u iznosu od 22.343,04 KM, UIO BH za iznos od 350,00 KM, Produkcija d.o.o. Mostar za iznos od 3.286,55 KM, Mikrofin MKD d.o.o. Banja Luka za iznos od 400,90 KM, Nestro petrol a.d. Banja Luka za iznos od 1.998,91 KM i Federalno Ministarstvo finansija za iznos od 1.010,00 KM tako da ukupne obaveze po osnovu kojih su blokirani računi iznose 29.389,40 KM, s tim da bi stvarni iznosi i eventualne druge obaveze dužnika mogle biti utvrđene tek na osnovu prijave potraživanja u slučaju otvaranja stečajnog postupka. Društvo je obavljalo djelatnost u zakupljenim prostorijama te nije vlasnik niti nosilac drugih prava na nepokretnostima što je utvrđeno uvidom u javne evidencije o nepokretnostima. Izlaskom na adresu registrovanog sjedišta društva nije utvrđeno postojanje bilo kakve imovine dužnika. Prema pribavljenim informacijama od MUP-a dužnik se vodi kao vlasnik tri teretna i jednog priključnog vozila (godina proizvodnje između 1999. do 2004. godine) s tim da su dva vozila objavljen zbog nekorištenja 2018. godine i 2021. godine, dok je za preostala dva vozila registracija istekla 2021. godine odnosno 2022. godine. U ovjerenoj izjavi datoj pod punom materijalnom i krivičnom odgovornošću direktor je izjavio da je njegov otac tokom 2022. godine bez njegovog znanja navedena vozila koja nisu bila u tehnički ispravnom stanju dao na otpad kao staro željezo. Dakle, tokom prethodnog postupka nije utvrđeno postojanje nepokretne, pokretne niti bilo koje druge imovine iz koje bi se mogli finansirati troškovi stečaja i namiriti povjerioci.

Stečajni dužnik a što proizilazi iz izvještaja i mišljenja privremenog stečajnog upravnika je u roku od 60 dana od dana nastupanja platežne nesposobnosti podnio prijedlog za otvaranje stečajnog postupka (prijedlog podnesen 14.04.2025. godine, a glavni račun blokiran 10.05.2022. godine).

Ispitujući prijedlog za pokretanje stečajnog postupka sud je utvrdio da je prijedlog za otvaranje stečajnog postupka dopušten i osnovan obzirom da je stečajni dužnik platežno nesposoban.

Cijeneći da su ispunjeni uslovi za otvaranje stečajnog postupka, a nakon provedenog prethodnog postupka i dostavljenog izvještaja privremenog stečajnog upravnika, te da je utvrđeno da stečajni dužnik nema imovine za podmirenje obaveza, sud je u smislu odredbe čl. 102 stav 7. Zakona o stečaju pozvao dužnika, povjerioce i sva zainteresovana lica da izvrši uplatu troškova finansiranja stečajnog postupka u visini od 3.500,00 KM iz kojih sredstava će biti finansirani svi troškovi stečajnog postupka (nagrada i naknada stečajnom upravniku, objavljivanje rješenja u službenim novinama, izrada pečata za društvo u stečaju, podnošenja finasijskih izvještaja nadležnim institucijama sve do postupka brisanja društva dužnika iz sudskog registra privrednih društava, procjena imovine odstrane ovlaštenih vještaka, objava oglasa za unovčenje imovine i drugo), obzirom da prema prijavi privremenog stečajnog upravnika društvo ne posjeduje imovinu.

Ukoliko predlagač, povjerioci ili neko od zainteresovanih lica u ostavljenom roku ne predlože otvaranje stečajnog postupka i izvrše uplatu predujma troškova za vođenje stečajnog postupka, sud će otvoriti stečajni postupak i odmah ga zaključiti u skladu sa odredbama člana 102.stav 8. Zakona o stečaju.

Odluka o dostavi rješenja i javnom oglašavanju putem oglasne ploče suda, WEB stranice Općinskog suda u Tuzli i javnog objavljivanja u Sl. Novina F BiH, zasniva se na odredbi člana 103. stav 8. Zakona o stečaju.

SUDIJA
Vedran Milašinović

POUKA O PRAVNOM LIJEKU: Protiv ovog rješenja nije dozvoljena žalba.